



Kamis, 17 Maret 2022

Ogen: Kejadin 19:12-22



Kelengi Kesahndu



Manusia ngeluh bas telu masa/waktu e me masa lalu (ndebih), masa sekarang (genduari) bage pe masa akan datang (wari pe pagi). Wari sinderbih mereken ngaruh ku wari si genduari, janah wari si genduari e pe mereken ngaruh ku bas wari si pe pagi. Amin bage gia perlu kal nge kita mbagun cara rukur si ngerehken kiniulin. Nina Joice Meyer "*Masa lalu mungkin menjelaskan mengapa kita menderita, tetapi kita tidak boleh menggunakannya sebagai alasan untuk tetap terikat.*" La sitik kalak si nggeluh genduari e tapi teriket, ipengaruhi kai si jadi bas masa si enggo lepas. Langa ngasup *move on* nina anak si nguda. Lut bas ogenta, ngalaken sada ujin si mberat bas Dibata nari. Perbahanen-perbahanen si meluat jadi i bas kuta Sodom, e maka ikernepenNa ateNa kuta e. Ilebu me Lut guna nadingken kuta e ras se isi jabuna. Lut pe erpengue, iperisngetina se isi jabuna segelah berkat nadingken kuta e. Pedas-pedas Lut mpersingeti calon kelana, tapi iakap kalak e ia erguro-guro. La ndekahsa seh me paksana, e maka Lut isuruh malaikat segelah pedas nadingken kuta e. Kata persinget si isehken man Lut "kiamken kelini kesahndu! Ola nulih ku pudi..." piga-piga kali Lut ipersingeti alu kata enda. Engkai maka la banci nulih ku pudi? Nulih ku pudi nurikenca maka Lut e erkeleng ate nandangi kuta sinitadingkenna e, lanai ngasup natap ku lebe janah e banci erbahanca ia pe ngaloken ukumen bagi kalak si tading i Sodom. Tapi adi Lut kiam natap ku lebe ncidahkan maka pengarapenna kerna ingan sienggo isikapken Dibata e terulin asangken Sodom.

Senina Moria, wari enda ibabai kita segelah ngasup natap ku bas wari si arah lebe. Banci jadi paksa genduari melala kel persoalan geluh erkiteken perbahanen bas wari si nderbih, e maka seh latihna siakap. Ula ndekahsa, ula rusursa nulih kempak wari-wari sinderbih, adi keleng ate nandangi kesahndu (kegeluhenndu) wari enda kita keke erbahan siterulin dingan simehulina. Tek kel kita maka si mehuli si ilakoken kita e mereken kiniulin kegeluhen bas wari-wari si reh enda.